

**Naalakkersuisut siulittaasuata ammaanermi oqalugiaataa**  
(Naalakkersuisut siulittaasuat)

Ataqqinartoq Inatsisartut siulittaasuat, ataqqinartut Inatsisartuni ilaasortat nunatsinnilu innuttaaqatikka.

Inatsisartut ataatsimiilerneranni Siulittaasup tikilluaqqusilluni oqaasiinut qujavunga.

Inatsisartut ukiakkut ataatsimiinnerisa aallartinnerani Naalakkersuisut siulittaasuata ammaanermi oqalugiaataa tassaavoq ukiumoortumik naalakkersuinikkut pissutsit, inuiaqatigiinni pisut kiisalu siunissamut pilersaarutinut tunngasunik nalunaaruteqarneq. Taamaattumik oqalugiaat manna Inatsisartunut tunngaannnarani aamma innuttaaqatinut saaffiginnissutaavoq, innuttaaqataasut politikerillu akornanni suleqatigiinnissamut periarfissanik ujartuiffiulluni.

Aasaq nuannersoq nukissanillu tunioraasoq qaangiussimalerpoq ukiallu anoraa inuummarinnartoq piumassuseqarnartorlu maanna takkutereerpoq suli sulisariaqarnitsinnik eqqaasitsilluni.

Ullortunermi nuannersorsuarmik puigunaatsumillu Namminersulernerput atuutilersoq nalliuottorsiutigaarput, qujanartumik silarsuup nukiisa pilluaqqussuteqarnerisigut silagissioqaluta. Persuarsiornartumik nalliuottorsiornitsinni nunatsinniit avataaniillu peqataasunut tamanut qujanarujussuaq.  
Maanna ulluinnaat suliffiusut aallarteqqereerpagut aatsipaagullu kangujarterlugit sulilluta aallartereerpagut.

Namminersulernerpummi pisussaaffiliivoq. Pisussaaffilerpaatigut maannamut inuiattut ingerlaaseqarsimanerput nalilersussallugu, allanngortissallugu aammalu allannguinernut naleqqussassalluta. Inuiattut immitsinnut napatisinnaassuseqarnitta annertusarnissaanik piumaffiginerput sakkortunerulerteriaqarpoq allatullu ajornartumik ingerlatsinitsigut sutigut sukateriffigisinnaasatsigut sukaterisariaqarluta. Suliassat siunissaq ungasinnerusoq eqqarsaatigalugu pilersaarusriluarnerullugit ataqatigiissarluarnerullugillu ingerlattariaqalerpagut.

Ukiuni makkunani annertuumik allanngoriartortoqarpoq – nunatsinniinnaanngitsoq nunarsuattali sinnerani aamma.

Nunatsinni kommunit aaqqissuussaanerinik allannguineq nutaamik eqqarsariartaaseqarnissamik aamma piumaffiginnippoq. Pissusitoqqat iluatinnartortai nassarlugit nutaamut ikaarsaarerput suleqatigiissutigalugu iluatsinniartariaqarparput.

Piffissaq inuuffigisarput unammillernarpoq. Ullut immitsinnuinnaq sammilluta nunarsuullu sinneranut ungasissumik iniusutut misigisimaffigisavut qaangiuteriikatapput. Nunarsuup sinnerani pisut kinguneri sivitsungaanganitsoq nunatsinni ingerlatsinitsinnut sunniuteqartalerput.

Nunarsuarmi aningaasarsiornikkut ajornartorsiortoqarnerata kinguneri misillerfigereersimalerpagut. Royal Greenland-imik aasaq annaassiniartariaqarsimanerput tassungarpiaq attuumassuteqarpoq, tassami aningaaseriviit Royal Greenland-ip akitsoqarfigisaasa akiliuteqartoqarnissaanik piumasaqarnerat peqquaalluni piaarnerpaamik iliuuseqartariaqarsimavugut.

Nunarsuarmi aalisakkat akii amerlanerpaatigut appasittuarsinnarput, puisillu aminik EU-mut eqqussueqqusiunnaarnermik aalajangerneq aamma naleqqussartariaqarnermik piumaffiginnippoq. Tamakkulu qaavatigut silap pissusaata allanngoriartornerata suli naleqqussarnerunissamik piumaffigivaatigut.

### **Naalakkersuisut nutaat**

Naalakkersuisut nutaatut aasaq manna qinigaasugut aallarteriarnerput amerlasuutigut misilinneqarfiusutut misinnarsimavoq.

Ullorpassuunngitsut qaangiupput ulla 100-t siilliit suliffigereeratsigit. Aperisoqarsinnaavorlu – suummi Naalakkersuisut maannamut angusimavaat?

Naalakkersuisunngortitsiniarneq namminermi immikkooruteqarpoq. Nutaarluiinnarmik tunngaveqarluta aallarteriarpugut, tassami Namminersornerulluni Oqartussaanerup oqaluttuarisaanerani siullerpaamik Siumut avaqqullugu Naalakkersuisunngortitsisoqarpoq.

Piffissaq manna iluatsillugu maannamut Naalakkersuisuusarsimasut tamaasa qamannga pisumik qutsavigiumavakka pitsaanerpaaqusorisatik aallaavigalugit nunarput inuila sullittarsimammatigit.

Naalakkersuisunngortitsigatta Naalakkersuisoqarfitt marlunnik ilavagut. Nunamut namminermut, Pinngortitamut Avatangiisinullu Naalakkersuisoqarfiliorpugut pisussanut aggersunut upalungaarsimaniarluta. Kommunit kattussuunerisa kingorna suliassarpassuit ataqtigiissaarneqarnissaat aammalu avatangiisitsinnik eriaginnilluni periuseqarnissaq annertusigaluttuinnartumik eqqumaffigineqalersoq eqqarsaatigalugit.

Peqqissutsimut Isumaginninermullu Naalakkersuisoqarfitt immikkoortippagut, misilitakkat takutimmassuk taakku suliassaqarfitt ataatsikkut ingerlanniarlugit oqimaappallaarujuusuartoq.

Kiisalu aamma Naalakkersuisooqatigiilernitsinni isumaqatigiissutitta timitalersornissaanik takussutissiisut inatsisissat nassuaatillu arlalissuit katersuunnitsinni matumani suliassaraagut. Taakkua saniatigut misissuitisinerit nunatta naalakkersuinikkut aqunneqarneranut sakkussagut arlallit ingerlannialersarpaagut, soorlu nunaqarfitt nunallu immikkoortuisa ineriartortinneqarsinnaaneranik periarfissanik ujartuinissat eqqarsaatigalugit.

### **Aningaasanut Inatsissatut siunnersuummi siunnerfiit**

Naalakkersuisuni siunnerfigaarpot Inatsisartut tamarmiullutik isumaqatigiissutigissagaat aningaasanut inatsisip aappaagumut ukiunullu aggersunut isertitatigut aningaasartutigullu oqimaqaqtigiilersinneqassasut, taamaalluta suliniutinut nutaanut akissaqalernissarput

angusinnaaniassagatsigu. Erseqqinnerusumik oqaatigalugu kissaatigaarput 2010-mi isertitat aningaasartuutilu oqimaaqtigiissinneqassasut 2013-illu tungaanut aningaasanut inatsisini sinneqartoorteqartalissasugut.

Royal Greenland-imut aasaq manna immikkorluinnaq ittumik aningaasaliisariaqarsimaneq Aningaasanut Inatsisissatut siunnersuusiassamut oqaatigeriikkattut imaannaanngitsumik kinguneqartitsivoq. Inatsisissatut siunnersuutip ataqatigiissinniarnera inuiaqatigiinnullu annernannnginnerpaamik aaqqiissuteqarnissaq ujartorlugu akisussaassusermik takutitsisariaqarsimavugut.

Kinguaagut taakkulu kinguaassaasa sapisngisamik akiitsortinneqarpallaaratik atugassaqartinneqarnissaat qulakkiissagutsigu sukangasuumik, sipaarniarluta isumatusaarlatalu ingerlatsiniarsarisariaqarpugut. Nunatta karsiata akiliisinnaassuseqarnera isumannanngitsumik inisseqqissappat sapisngisamik annikinnerpaamik amigartoorteqarnissaq anguniartuartariaqarparput.

Nunatta karsia 1987-imiilli aatsaat taamak siorna amigartoorteqartigaaq – 300 million koruunit sinnerlugit amigartoorteqarmat. Naak taakku amigartoirutit amerlanerpaartaat, 200 million koruunit, Nukissiorfinnut erngup nukissiorfissanut atugassiisutitut atukkiussaagaluartut. Aningaasat taakku nunatta karsianut uteqqittussaapput, taamaakkaluartorli pisinnaassuserput sipporlugu inuuniarnissaq killilersimaartariaqarparput.

Maannakkut iliuuseqartariaqarpugut, sutigummi tamatigut inuuniarnikkut atukkavut ajorseriassanngippata iliuuseqarnissarput pisariaqarluinnarpoq.

Taarsigassarsisariaqalertussaavugut, tamanna qularnanngilaq. Kisianni taamaammat imaanngilaq killilersimaarniassanngitsugut. Inuussutissarsiornikkut ukiuni aggersuni aningaasaliiffigisariaqarfifisassavut qiviarylugin aningaasanik nunanut allanut atorniartariaqalernissaq pisariaqartussaavoq.

Peqatigisaanik ingerlatsinermut aningaasartuutivut qaffakkaluttuinnarput, pingaartumik inunnik isumaginninnikkut, peqqinnissaqarfimmuit aammalumi ilinniartitaanernut aningaasartuutigut eqqarsaatigiinnaraanni.

Soorunalimi aningaasaliissutit inuiaqatigiinnut pitsasumik kinguneqartussanngorlugit aningaasaliissutigineqartarput. Tamatta inuttut ataasiakkaatut immitsinnut nappassinnaassuseqarnerput ujartortuarutsigu taava nunatta aningaasaqarnikkut ingerlatitaaneranut kivitseqataassaagut.

Siunissaq eqqarsaatigalugu sillimaniarnissaq pisariaqarpoq. Kinguaagut taakkulu tullii kisiisa eqqarsaatiginagit aamma uagut immitsinnut eqqarsaatigaluta. Utoqqaligutta isumassorneqarnissarput aamma qulakkeertariaqarparput. Naatsorsuinerit takutippaat ukiut 25-t qaangiuppata nunatsinni utoqqaat isumagineqartariaqartussat amerlassusiat ullumikkorniit marloriaatinngortussaasoq.

Tamakku aamma eqqarsaatigisassatta ilagaat.

### **Aningaasanut Inatsisissami pingaarerutitat**

Aningaasanut Inatsisissatut aappaagumut ukiunilu aggersunut siunnersuutitsinni pingaarerutillugu qitiutipparput nunatsinni innuttaasut inuuniarnikkut atukkamikkut pitsanngorsaavigineqarnissaat anguniarlugu aningaasaliissuteqarnissaq.

Siunnersuummi pingarnerutillugit aningaasaliiffigerusutagut naatsumik oqaatigalugit makkuupput:

- Illoqarfinni inissaaleqiffiunerusuni nutserfiunerusunilu attartortitsilluni inissialiortitsinerit amerlanerusut
- Meeqyanut inuusuttunullu suliniutit annertusaaviginissaat
- Napparsimavinni suliarittinniarlutik utaqgisut ikilisaavagineqarnissaat
- Siusinaarlutik sulisinnaajunnaarnersiuteqartut pisartagaasa qaffaaffigineqarnissaat
- Ilanniartitaanerup qaffassarneqarnissaanguniarlugu immikkut aningaasaliissutit attatiinnarnissaat
- Ilanniartut ineqarfinitik sanaartornerit, kiisalu ilanniartut taamaatiinnartartut ikilisinniarlugu suliniutinut aningaasaliissutit

Aningaasanut Inatsisisap saqqummiunneqarneraniit sapaatip akunneri pingasut qaangiussimalerput, taamanerniillu pingartumik kommuninut ataatsimoortumik tapiissutaasartut sipaaruteqarfingineqarnissaannik nunaqarfinnilu sanaartugassanut unikaallatsitsinermik siunnerfeqarnerput sakkortuumik isornartorsiorneqaatigisimavarput.

### **Nunaqarfinni periarfissat**

Imminut pilersorsinnaassuseqarnitta annertusarnissaaikorfartorniarlugu akisussaassuseqartumik takutitsisariaqarsimavugut. Nunaqarfinni sanaartugassanut aningaasaliissunik nikititerineq nunaqarfinnik ineriartortitserusussuseqannginnertut paasineqassanngilaq. Erseqippoq nutaamik pilersaarusiortariaqarneq saneqqunneqarsinnaangitsoq.

Nunaqarfinniit isorliunerusuninngaanniillu illoqarfinnut suliffissaqarfiusunut nutsertoqarnera isigingngitsuusaarneqarsinnaanngilaq. Illoqarfinni taakkunani inissaaleqisoqarpoq, pingartumik manna Nuuk eqqarsaatigalugu, tamannalu iliuuseqarfinginiarlugu taama siunnersuuteqarpugut.

Taamatut ineriartortoqarnerata takutippaa inuit imminut napatisinnaanerminnut periarfissaq malersortuaraat. Nunatta karsiata naatsorsuutai aasaq manna saqqummiunneqarmata atuarneqarsinnaavoq suliffissaaleqisut ukiuni 20-ni kingullerni siorna aatsaat taamak ikitsigisimasut. Aamma qanittukkut tusarparput Aasiannigooq sulisinnaasut tamarluinnarmik maanna sulilersimasut. Taamaattoqarnera nuannaarutissaavoq. Piginnaanngorsaaqqiinermi pisortat kisimik pinnatik aammali suliffeqarfiiit akisussaaffeqarnerat matuman erseqiissatigissallugu pingaruteqarpoq, tassami amerlanerusut imminnut sulinermikkut isumaginerat angussagutsigu sulisinnaassuseqartut tamarmik sulisinnaanerat atorneqartariaqarpoq.

Kiisalu aamma eqqaamasassaavoq nunaqarfinni tamani sanaartornernik unitsitsiniartoqanngimmat. Nunaqarfiiit inuussutissarsiornikkut siuariartorfiusut nutserfiusullu sanaartorfigineqartarnerat ingerlaannassaaq.

Nunaqarfiiit sorlerpiat, isorliunerusuni illoqarfiiit kiisalu nunap immikkoortuini inuussutissarsiornikkut periarfissat paaseqqissaarumallugit aammalu innuttaasut nutsertarnerinut tunngassuteqartut paassisutissat pissarsiariumallugit misissuisitsinerit sukumiisut aallartisarpagut. Suliassap tamatumma qanoq ingerlanneqarnissaanik allaaserisaq naammassingajalerpoq, taamaalilluni suliap annertoorujussuusussap

pisariitsuinnaasussaanngitsullu qanoq iliorluni aaqqissuunneqarsinnaanera piffissami qaninnermi takujuminarnerulersussaalluni.

Misissuititsineq taanna naammasseriarpat nunatta ingerlatitaaneranut aqtsinitsinni sakkussaqalissaagut pitsammik.

Alla aamma pingaarutilik ilannguttariaqartoq tassaavoq ilinniartut ineqarfissaannik amerlanerusunik sanaartortitsisariaqarneq, matumani aamma nunaqarfinniit illoqarfinnut ilinniariartartut eqqarsaatigalugit, pisariaqarmat aningaasaliiffigisassatut siunnersuuteqarnerput taama isikkoqartippalput. Nunarpullu ataatsimut isigalugu amerlanerusunik inissialiortitsisoqarnissaanik siunnersuuteqarpugut, tamakkulu tamarmik kommunit aningaasaqarnerinut aamma sunniuteqarluartussaapput.

### **Kommuninik aaqqissusseqqinnerup siunertaa**

Aningaasaqarnikkut inissisimanerput peqqutigalugu saneqqunneqarsinnaanngilaq sutigut tamatigut ingerlatsinikkut aningaasartuutitta ikilisartariaqarnerat.

Inatsisartut kommunit kattussuunneqarnissaannut aalajangernerminni tungavigisaasa pingaarutilit ilagaat kattussuunneq aningaasartuutit ikilisarneqarnissaannik kinguneqartitsisussaammat. Illuatungaani Namminersorlutik Oqartussaniit kommuninut akisussaaffinnik ukiuni aggersuni nussuinissat kommuninut aningaasanik amerlanerusunik aqtaqalernissamik kinguneqartitsisussaavoq.

Kommunit aaqqissuuteqqinneqarnerisa kingunerisaanik suliassaqarfiit Namminersorlutik Oqartussat ataanniittut kommuninut nussorneqalerpata iluatsittumik angusaqarnissami qanimut suleqatigiinnissaq ataqatigiissaarilluarnissarlu pisariaqarluinnartussaapput. Suliassat kommuninut nuunneqartussat maannangaaq ulapputigineqarput, naatsorsuutigaarpullu aappaagu julip allaqqaataa tikitsinnagu innarluutilinnik isumaginninnej, immikkut atuartittariaqakkanik isumaginninnej, atuarfeqarfinni turnip pissusaanik isumaginnittooqarfik imigassamillu pinngitsuuisinnaajunnaarsimasut katsorsarneqartarnerannut tunngasut nuunneqarnissaat. Taamatut nussuinissani anguniarneqarpoq suliat angusaqarfiunerpaaumik innuttaasunullu qaninnerpaamik iluaqutissiinerpaasumillu naammassineqartalernissaat.

Taamaattumik Naalakkersuisut kissaatigaat akisussaaffinnik nussuinissanik tunngasunik isumaqatiginniinnaernerit qunuissuseqartumik, akisussaaqatigiinnermik misigisimanermik piissutsinillu piviusunik aallaaveqartumik ingerlanneqarumaartut.

Tamatuma saniatigut kommunit nunaqarfinnilu aqtsisut kattussuunneqarnerisa aamma piumaffigaatigut nutaamik eqqarsariartaaseqarnissamik. Tamat oqartussaaqataanerisa aaqqissuunneqarnera tassa ilaatigut allanngorluinnarnikuvoq. Qanga sungiusimasavut, soorlu qinikkanik kommunip allaffianukarluni oqaloqateqarsinnaaneq, maanna allatorujussuaq aaqqissuunneqarsimalerput. Sungiunniagassarilerparput qinikkanik attaveqartarnerup allatut periuseqarluni ingerlanneqartariaqarnera.

### **Sipaarfiusinnaasut aallerfiusinnaasullu**

Ingerlatsinermut aningaasartuutinik ikilisaanissaq tamanut piumasaqaatigaarpot. Kommunini, Naalakkersuisoqarfinni Inatsisartullu Siulittaasoqarfiani sipaarniaqqusivugut. Taassuma saniatigut inissialiortitsinerit aaqqissuuteqqinnerisigut Namminersorluni Oqartussat sulisuunut inissialiortitsivugut utaqqiisaasumik ineqartitsisarnernut aningaasartuutit qaffaseqisut apparsarniarlugit. Aamma sulisut initaannginnerminni utaqqiisaasumik akeqanngitsumik

ineqartinneqartarnerat allannguiffinginiarpapput, akiliuteqartitsisalernissaq atuutilersinniaratsigu.

Atuisut akiliisinneqartalernissaat aamma allatigut siunnerfigaarpuput, soorlu makkunatigut:

- Nassiussinermi akitsuuteqartitsinissaq
- Mittarfeqarfitt ingerlanneqarnerinut akitsuuteqartitsinissaq, billetsip ataatsip 36 koruuninik akisuneruleranik kinguneqartussaq
- Utaqqiisaasumik ineqartinneqarnermi atuisup akiliuteqartalernissaa
- Aalisarnermi nakkutiliinermi atuisut akileeqataasalernissaat

Aamma akitsuusiinissat eqqarsaateqarfagaagut, makkunuunatigut:

- Suliffimmut atatillugu biileqartitsisarnerup qaffasinnerusumik akiliuteqarfigititalernissaat
- Avataasioluni aalisakkanik tunisassiornerup akitsuusiiffigisalernissaat

Akitsuutit allat pissakinnerusunik eqquisussaanngitsut aammalu avatangiisnik mianerinninnerunissamik siunertaqartussat aamma eqqarsaatigineqarsinnaapput.

Kiisalu meeqlanut 18-it inorlugit ukiulinut ileqqaartitsisarnerup ukiortaamiit atorunnaarsinneqarnissaa siunnersuutigaarpup, meeqlammi ikorneqarnissamik pisariaqartitsisut maannangaaq ikiorserneqarnissaat angorusunnerugatsigu.

Aamma piffissanngorpoq ingerlatseqatigiiffinnut assigiinngitsunut aningaasaliissutaasartut sukumiisumik misissuiffingineqarnissaat. Ilumut taama ingerlatsiinnassaagut? Inuaqatigiit aningaasaataat 1 milliard koruunit missaanniittut aktiaateqarluni ingerlatseqatigiiffinnut ingerlatanullu assigiingitsunut pituttoqqavagut. Aningaasat immaqa inuaqatigiinni kinguneqartitsilluarnerusussanut atorneqarsinnaagluartut.

Ammasumik eqqartortariaqarparput pisortat suliffeqarfinnik assigiingitsorpassuarnik piginnittuunerat sunik siunertaqarluni ingerlanneqassanersoq. Soorunami isumaqatigiissutigisinnaassavarput inuaqatigiit iluaqtissaannik pilersitsivittut ingerlanneqarnissaat aallaaviussasoq, kisiannili iluaqtissat sumiinersut takujuminaalligaangat apeqqusertariaqarpoq ilumut piginnittuuginnassanersugut akileraartartullu akiliutaat taama amerlatigisut amingartoorutaasartunut akiliutigissanerigut.

Tamatuma saniatigut naalakkersuinikkut ingerlatsinerup, inuuussutissarsiuutnik ingerlatsinerup aningaasarsiornikkullu ingerlatsinerup imminnut akulerilliunnartutut ingerlaannassanersut imaluunniit inuaqatigiit ataatsimut isigalugit allatut ingerlalernissamik siunnerfeqassanersugut isummerfigisariaqarparput. Naalakkersuisuni suliffeqarfitt pisortanit tamakkiisumik ilaannakortumilluunniit pigineqartut tamaasa nalilersuiffagalugit sulivugut, erseqqinnerusumik isummernissamut tunngavissarsiorluta. Taamatut nalilersuinermi aallaaviit ilagissavaat suliffeqarfitt pigineqartut assigiingitsuunerat, soorlu pilersuinermik ingerlatsiviunersut, tunisassiornermik ingerlataqartuunersut, inuaqatigiit aningaasarsiornernannut sunniutaat, suliffeqartitsinermut sunniutaat allallu tunngaviusumik isummernissamut pingaaruteqarsinnaasut.

Aningaasaqarnikkut ingerlanitta ilorraap tungaanut saatinniarnerani tamavitta suleqataasariaqarpugut. Allatut ajornavissumik sukangasuumik siunissarlu ungasinnerusoq

eqqarsaatigalugu pilersaarusrorlularluta ingerlatsisariaqarpugut. Tamannarpiaq peqqutaalluni aningaasanut inatsisisstatut siunnersuuterput taama isikkoqarpoq. Siunnersuutip oqallisiginissaani illuatungiliuttut suleqatiginissaat qilanaaraarput, neriulluta isumassanik suli pitsaanerusunik nassaarsinnaassalluta.

Ilanngullugu ilisimatissutigissavara nunatta namminerisamik aningaasaqalernissaanik suliniut Naalakkersuisuniit naliliiffigeqqissallugu aalajangeratta, matumanilu Inatsisartut isummernissaannut periarfissijumalluta suliaq qaqqeqkumaarparput.

### **Ilinniartitaaneq**

Inuaqatigiit ingerlatitaanerat kisimi naleqqussagassaanngilaq, innuttaasummi ataasiakkaarluta ineriaroqqissinnaanissatsinnut naleqqussarnissamut piumaffigisariaqarpugut.

Naleqqussarneq iluatsinnerpaajussappat inuttut ataasiakkaarluta inuaqatigiit ingerlatitaanerannut tunniussaqarsinnaassuserput qiviaqqaagassaraarput. Inuaqatigiinnut iluaqutaanerpaasumik imminut pilorsorsinnaassuseqarnera qanoq iliorlunga pitsangorsarsinnaavara? Apeqqut taanna ammasupilussuuvvoq, tassami taama aperinermi perorsaariaaseq ilanngunneqanngitsoorsinnaanngilluinnarmat.

Ilinniagaqarsimassusera naleqquppa? Suli angusaqarnerusinnaavunga? Sulinikkut tunniussaqarsinnaassusera suli qaffassarnerusinnaavara?

Oqaasinaatut uteqattaakkatut nipeqarsinnaagaluarpoq, kisianni oqaatigeqqillara: ilinniarneq kisimi aqqutissaavoq.

Tamanna aamma nunatsinni inuusuttut paasilhuarsimagaat malunnarluarpoq, tassami ilinniarfinnut tamanut qinnuteqartartut aatsaat taamak amerlatigilerput. Ilinniagaqassutsip qaffassarnissaanik siunnerfeqarnerput innuttaasunit tapersorluarneqarmat nuannaarutigeqaara.

### **Ilinniartitaanermi siuariartortoqarpoq**

Nalunngilarput EU ilinniartitaanernut immikkut ittumik ukiumut 200 million koruunit missaanni aningaasaliissarmat. Aningaasaliissutit taakku pisarniaraanni piumasaqaataavoq ilinniartitaanerup ineriarorneranut tunngassuteqartunik paassisutissanik amerlasuunik EU-mut tunniussaqartarnissaq. Oqaatigisimmaavaralu EU-p nunatsinnik taama suleqateqarnini nuannaarutigisorujussuummagu, tassami Kalaallit Nunaat nunani EU-mik taama suleqateqartuni ilinniartitaanerup tungaatigut siuariartornerpaanut ilaavoq. Nunat OLT-nik taaneqartartut akornanni nunatsinni ilinniartitaanernut ukiumut aningaasaliissutigisartakkavut amerlanerpaapput, tassa aningaasanut inatsimmi aningaasaliissutit 19,5 %-ii ilinniartitaanernut maanna aningaasaliissutigisaratsigit.

Ilinniartitaanernut aningaasaliissutit iluaqutaalernerannut ersiutit maanna paatsuugassaanngillat. Ilinnialerumallutik aallartittartut amerliartuinnavippuit, ilinniakkaminnik naammassinnittartut amerliartorput kiisalu ilinniakkaminnik taamaatitsiinnartartut ikiliartorlutik. Nalunaarutit allat aamma takutippaat ilumut ilorraap tungaanut ingerlasugut ilinniakkaminnillu taamaatitsiinnartartut suli ikinnerulersinniarlugit aningaasaliissutit amerleqqippagut, soorlu ilinniartut ineqarfissaannik nutaanik sanaartornernut.

Piareersarfitt aamma ingerlalluarput. Piareersarfitt ilinniaqqinniarluni siunnersuveqarfittut ingerlalluarnermikkut aamma ilinnialeraluarlutik taamaatitsiinnartartut ikiliartornerinut tapertaasupilorujussuupput. Kiisalu nunatsinni tunngaviusumik ilinniarfitt suleqatigalugit ilinniagaqarsimannngitsunik piginnaanngorsaaqqittarnerit ingerlalluarputtaaq. Pingaartuuvoq suliffeqarfitt sulisussanik amigaateqalersussaasut, soorlu aatsitassarsiornerup iluani, inunnillu isumaginninnermut attuumassuteqartuni nunaqavissunik pisinnaasunik sulisoqarsinnaanissaannik qulakkeerinninniarnissaq.

### **Oqaatsit**

Ilinniaqqinniaraanni oqaatsitigut piginnaasat ajunngitsuunissaat piumasaqaataavoq. Oqaatsit pillugit politikkissap inatsisitassaa katersuunnitsinni matumani suliassatta ilagaat. Politikkissaq ineriigaanngilaq, kisiannili sinaakkutissatut ilusiligaalluni. Inatsisissaq nutaaliornertaqarpoq, tassa pisortat kisimik akisussaafffigisassaatut aaqqitaanngimmat kisiannili suliffeqarfitt ilinniarfeqarfiillu politikkissami timitalersueqataasussatut akisussaaffilerneqarmata.

Oqaatsinik ilinniartitsinerunissaq – kalaallisut, qallunaatut tuluttullu – pinngitsaaliissutit piumasaqaatigisinnanngilarput, kisianni inatsisissakkut suliffeqarfitt piumaffigineqassapput oqaatsit pillugit namminneq timitalersukkaminnik politikkeqaleqqullugit. Naalakkersuisuniit taama oqariartuuteqaratta imaanngilaq qasukkarsimaaginnarluta ingerlasoqarnissaa innersuussutigipput, kissaatiginaqaarmi kalaallit oqaatsitta ataaqqineqarnerullutik atorneqarnissaat pimoorunneqarnerulissasoq.

### **Inunnik isumaginninneq**

Nunatsinni innuttaasut periarfissaat naligiissumillu inuttut ataasiakkaatut ataaqqinassuseqarnerat qulakkeerniarlugu naalakkersuinikkut ingerlatsisariaqarpugut.

Eqqarsaatigeriartigumi.... inuaqatigiittut ingerlatitaanitsinni pingaartitagut suussappat?

Eriagisariaqarparput akileeqqaarata ilinniarsinnaanissamik periarfissaqaratta.

Eriagisariaqarparput napparsimalerutta akileeqqaarata nakorsiarsinnaagatta.

Eriagisariaqarparput meerartatta utoqqartattalu paaqqutarineqarnissaannut pisortat oqilisaassisuuusarmata.

Ila eriagisassarpassuagut taamaattussaannartut isigilersimasagut taagorsinnaasagullu arlaqaraluqaat, ilorlikkulli inuunitsinni eriagisariaqakkavut naneqqittariaqarpagut.

Akuersaarsinnaanngilarpummi meerartatta akornanni inuuniarnikkut ajornartorsiortoqarnerujussua.

Akuersaarsinnaanngilarput meeqqat kinguaassiutimikkut atornerlugaasarnerat. Meeqqat meeraasinnaatitaanerat tamatigut illersortuartariaqarparput.

Akuersaarsinnaanngilarput nunatsinni kaattoqartarnera, piitsuussutsillu nungusarnissaa sulissutigiuartariaqarparput.

Inuaqatigiinni pissaqassutsip nikinganerujussua sukumiisumik paasisaqrfigiumallugu Naalakkersuisut ukiarmannamiit suliniummik aallartitsilerpugut, matumani piitsuussutsip pisortatigoortumik killeqartinneqalernissaa inissikkusukkatsigu. Misissuititsinissaq Inatsisartut isummersimarannik tunngaveqarpoq.

Taamaalioreerutta siunissami ajornanginnerusumik takusinnaalissavarput nunatsinni piitsuussutsip ajornartorsiutiginera ilumut qanoq annertutigisoq.

Meeqqat inuuusuttullu ataqtigiissumik suliniuteqarfingineqarnissaat qulakkeerniarlugu suleqatigiissitamik upernaamiit sulisitsisoqarnikuuvoq, taakkulu innersuussutaat katersanngorlugit qaammammi tullermi saqqummiunneqartussaapput. Suliaq taanna siammasissumik susassaqartuniit tamanit suleqatigiiffingineqarnikuummat pissangalluta utaqqivarput. Innersuussutaasussat siorngersimaarfiginiarlugit meeqqanut inuuusuttunullu suliniutissanut aningaasaliissuteqarnissaq siunnersuutigaarpuit.

Periarfissaq manna iluatsillugu nunarput tamakkerlugu piumassutsiminnik sulisut, pisariaqartinneqaqisullu, qamannga pisumik qutsavigiumavakka. Assersuutigiinnarlugu meeqqat inuuusuttullu inuunerinnerulernissaat anguniarlugu suliniartut assigiinngitsut soorlu "Meeqqat Inuunerissut", timersoqatigiiffippassuarni sulisut sutigullu allatigut inuiaqatigiinnut tamanut iluaqtissaasumik sulisut tamassi qujanarsuaq.

### **Peqqissuuneq**

Nunatsinni innutaasugut amerlagisassaanngilagut. Taamaammat tamatta immitsinnut pisariaqartippugut, taamaattumillu susassareqatigiissumik nammaqatigiillutalu ingerlaqatigiittariaqarnerput sulissutigiuartariaqarparput. Sulisinnaasut tamaviisa pisariaqartippagut, peqqissuunissarpullu pingaaruteqaqaaq.

Innuttaasut peqqinnerulernissaat anguniarlugu Inuuneritta aqqutigalugu anguniagarpassuaqarpugut, aappaagu nalilersuiffigineqartussanik. Naalakkersuisuniilli meeqqat peqqinnerulernissaat anguniarlugu immikkut iliuuseqarnissaq pingaaertippaput.

Inoriaaseq peqqutaalluni nappaataalersartut ingalassimaniarlugit pinaveersaartitsinerit ingerlappagut, sulilu ikorfartueqataanerorusulluta saaffiginnittarfinnik siunnersuisarfiutigisunik pilersitsinissaq siunnerfigaarpuit. Taakkunani soorlu aap naqitsinera, sukkorneq, kolesterol-ip uuttortarneqarnera, puaat pisinnaasaanik uuttortaanerit inooriaatsimillu allannogortsiniarnermi siunnersorneqarsinnaanerit pisinnaalissallutik.

Peqqinnissaqarfimmi unammilligassavut amerlaqaat. Ilinniarsimasunik sulisussaqarniarneq ajornartorsiutigeqaarpuit. Tamanna peqquttaaqataalluni peqqinnissaqarfiup ingerlanneqarnera allatut ajornavissumik aaqqissuuteqqinneqartariaqalerpoq. Nunap immikkoortuini napparsimmaveqarfiit anginerit tallimat pilersinneqarnissaat siunnerfigaarpuit, matumani ullutsimni pissutsinut naleqqunnerusumik aaqqiinissat anguniarneqartariaqarmata. Ilanngullugu aamma nunatsinni peqqinnissaqarfiup aaqqissuussaanera aningaasatigullu aqunneqarnera tamakkiisumik sukumiisumillu paasisaqarfinginiarlugu misissuititsineq ingerlanneqalerpoq.

Peqqinnissaqarfimmi ilinniarsimasunik sulisussaqarnikkut ajornartorsiorterput imaaliallaannaq qangeruminaappoq, sulisussammi Skandinaviami aamma amigaatigineqaqimmata. Pingaartumik nakorsanut peqqissaasunullu taartaagallartutut sulisunut aningaasartuutaasartut qanoq iliorlumi aalaakkaasumik sulisorisat amerlanerulernissaannut suloriinnarnissaannullu atorneqarnerusinnaanerat anguniarlugu misissuineq ingerlavoq. Suleqatigiissitallu sulineranit piviusunngortitat takussaalereerput, assersuutigiinnarlugu nunanit Skandinaviap avataaniittuniit peqqissaasunik tikisitsilluta atorfinitisitsisalerpugut.

Peqqinnissaqarfimmi pissutsit taamaannerat aamma suliariitinniarlutik utaqqisut amerlassusiannut sunneeqataavoq. Inuit suliariitinniarlutik utaqqisut utaqqinermik nalaani

sulisinnaajunnaartarnerat aammalu anniaateqartarnerujussuat inuiaqatigit ingerlanneqarnerannut kalluaasarpooq. Taamaammat suliaritinniarlutik utaqgisut ikilisarniarlugit immikkut aningaasaliissuteqarnissaq siunnerfigaarputtaaq.

### **Inuussutissarsiutit**

Sulisinnaaneq angusaqarsinnaassuseqarnerlu qaffassarniarlugit iliuuseqarnerusariaqarpugut. Nunatsinni inuussutissarsiutinut aningaasarsiorfiunerusinnaasunut ikaarsaariartornissaq eqqarsaatiginerusariaqalerparput. Inuussutissarsiutit tapiissuteqarfiusut qimaniartariaqarpagut allanullu iluanaarnarnerusunut nuussinnaanissaq anguniarlugu pikkorissaqqittarnerit aqqutiginiartariaqarpagut.

### **Aalisarneq**

Naak aalisarneq suli inuussutissarsiutit pingaarnersarigaluaraat taamaattoq tassanittaqaq aqqissusseqqinnissamik naleqqussaanissamillu pisariaqartitsineq miserratigineqarsinnaanngilaq. Biologit siunnersuinerat isiginiarlugu aalisakkat pisassiissutigineqarsinnaasutut innersuussutigineqarsinnaasut ajoraluartumik ikiliartorput. Peqatigitillugu miserratigineqarsinnaanngilaq aalisagaqassutsip nammassinnaanngisaanik pisassiissuteqartarsimanerit peqassutsimut kinguneqapilummata. Nuannaarutissaqalaarpugulli, tassami avataasiorluni Davisstrædimi qaleralittassiissutigineqarsinnaasutut innersuussutit qaffariaateqarmata.

Ilanngullugu oqaatigissavara aalisakanik tunisassiornermi akitsuuteqartitsalernissaq avataasiorluni aalisakanik tunisassiornermut atuutitinneqalernissaa siunnersuutigigatsigu. Tamanna ukiorpassuanngulersuni Inatsisartuni eqqartortarsimavarput avataasiorlunilu aalisarnermi iluanaarutaasartuni inuiaqatigiit pissarsisinneqartalernissaat qulakkeerumallugu taama aaqqiissuteqarniarpugut. Erseqqissaatigissavarali, akitsuusiiniarneq sinerissap qanittuani aalisarnermut sunniuteqartussaanngimmat.

Akitsuusiiniarnermi kalluarneqartussat tusagassiuutit aqqutigalugit naammagittaalliuteqareerput, oqaatigisinnaavaralu aalajangernerup avataasiorluni aalisarnermut sunniutissai pillugit naatsorsuinerit maanna ingerlanneqarmata siunertaavorlu aningaasanut inatsisisapp siullermeerluni oqaluuserineqalinnginnerani suliap naammassereerneqarnissaq.

Aalisarneq pillugu ataatsimiititaliarsuup nalunaarusiani ukioq saqqummiuppaa innersuussutillu aalisarneq pillugu inatsisisapp piareersaasiorfigineqarnerani ilanngunneqarlutik. Naalakkersuisuni isumaqarpugut aalisarneq pillugu inatsisisapp peqqissaarussamik mianersortumillu suliarineqartariaqartoq. Inatsisisapp maani suliassanngortinnginnerani misissugassat pisariusut suli arlaqarallarput, taamaattumillu inatsisisapp suliarineqarnissaq kinguartikkallarparput.

Taamaakkaluartoq ataatsimiititaliarsuup innersuussutigisamini oqariartuutai paatsuugassaanngillat: sinerissap qanittuani aalisarneq imminut akilersinnaassappat aalisariutikillisaanissaq pisariaqarpooq.

### **Piniartuuneq**

Piniartut inuussutissarsiornermanni aamma imaannaanngitsorsirop, nuannaarutissaavorlu piffissaq ungasinngitsoq qaangiuttoq qilalugartassiissutit ukiorpanngulersuni aatsaat taamak amerlatigisut pisassiissutigineqarmata. Naalakkersuisuni pisassiissuteqarnitsinni siullerpamik ukiunut arlalinnut pisassiissuteqarpugut, ukiunut pingasunut tulliuttunut.

Taamaaliornitsigut piniartut periarfissippagut inuussutissarsiornerminni siunissamut ungasinnerulaartumut isiginiarlutik pilersaarusiorsinnaalernissaannik.

Nunarsuaq tamakkerlugu arfanniarnermut ataatsimiitiliarsuarmut tunngatillugu ukioq manna uagutsinnut aalajangiisuuussaaq. IWC-p ukioq manna ataatsimeersuarnerani nunatta qipoqqartassineqarsinnaaneranik immaqalu tikaagullittassiissutit ikilineqarsinnaanerinik apeqqutit isumaqatigiinngissutaapput, taakkulu ukiup naannginnerani isummerfigineqartussaapput. IWC-mi arfattasiisarneq misigissutsinik aallaaveqarnermik tunngaveqariartuinnavimmat aammalu ataatsimiitiliarsuup unittooqqanera isiginiarlugu nunatta IWC-p ataani arfattasiissutitigut aalajangersaavagineqartarnera ilumut taamaaginnassanersoq katersuunnitsinni matumanissaaq eqqartugassatta ilagaat.

### **Puisit amii**

EU-mi nunat puisit amiinik tunisassianik eqqussueqqusiuunnaarnerat ilaqtariippasuarnut piniartukkormiunut eqquierloqaaq. Amminik avammut tunisaqartarnerput siornaamiit unilluinnaqqavoq. Amminik akitsorterussisarfut puisit amiinik tunisisarnerat unilluinnaqqavoq, maannalu ammit Great Greenland-imi uninngasuutit 200.000-t anguaat.

EU-p taama aalajangernerminut atallugu inatsisip atuutitinnissaanut malitsigisassartai suli aalajangersorpaq, naallu amminik EU-mi nunanut eqqussueqqusinnginneq inuiannut Inunnut atuutitinneqanngikkaluartoq taamaattoq ajarluinnartumik inisseeqqavugut. EU-mi nunanut puisit amiinik tunisaqaqqittalissagutta nalunaarsuisussaatitaanermik piumasaqaatit pisariulluinnartut naammassereersimanngikkutsigit periarfissaqanngilagut. Taakkununnga tunngatillugu nalilersuinerit maanna ingerlatileruttorpagut.

Taamatut aalajangiisoqarnera uggorartuuvoq, puisimmi amitsiarsua pitsassuuvoq – inuiaallu allat imaaliallaannaq paasitinniarnerat ajornakusoortuuvoq.

Pingaartumik aataat amerliartornerat peqqutaaqataalluni uummassusillit nerisareqatigiittarnerat eqqarsaatigalugu inuit aalisakkanik nerisaqarnerat puisinit unammillerneqalerpoq. Nunatta Canadallu akornanni imartami puisit maanna 8 million-it missaanniipput, Pingortitaleriffimmilu biologit missingiuppaat puisit taama amerlatigisut ukiumut 8 million tonsnik imarmiunik assigiinngitsunik nerisaqartartut.

### **Oqaasiinnaanngitsumik piujuartitsineq**

Aalisartuunermik piniartuunermillu inuussutissarsiuteqarnerup aaqqissuunneqarneragut torersagassarpaasuaqaraluarluta taamaattoq Naalakkersuisuniit inuussutissatigut immitsinnut pilersorsinnaassuseqarnitta annertusartuarneqarnissaa pingaartippalut.

Kinguatta taakkulu kinguaassaasa uumassusilinnik pissaqartittuarnissaat qulakkiissagutsigu pingaaruinnartuuvoq piujuartitsinermik tunngaveqartumik pisassiissuteqartarnissarput. Pijuartitsiniarneq oqaasiinnaatinngagu kisiannili tamatta paaseqatigiiffigisatsinnik pisassiissuteqartarnerit aaqqissortariaqarpagut, pingaartumik aqtsinikkut ukiunut arlalinnut pilersaarusiortarnerit atorluarnerisigut aamma.

Nerisassaatittami peqqinnartuunerat ilisimatuussutsikkut qangaaniilli uppermarsineqareerpoq. Nunap immikkoortuisa inuussutissarsiutitigut tunniussinnaasai isiginialerutsigit nunatta kujataata nunaateqarnikkut tunniussinnaasai avaqqukkuminaapput.

### **Inuussutissarsiutit allat**

Aalisartutut piniartutullu inuussutissarsiuteqarnerup kinguariartorfiunerata saniatigut nunarsuarmi aningaasarsiornerup ajornartorsiorfiunerata kingunerisaanik nunatsinni takornariaqarneq aamma kinguariarfivoq. Taamaakkaluartoq takornariaqarnermi immikkut misigisassarsiortitsilluni takornariartitsisarnerit inerisaaviginiarpagut.

Nunarsuarmi aningaasarsiornikkut ajornartorsiortoqarnerata kingunerisaanik avataaniit aningaasaliissuteqarluni ingerlatat ingerlanniakkallu sunnersimaneqarput, kisiannili pilersaarutit amerlasuutigut unitsinneqaratik utaqqimaarutigineqarnerat malunnarpoq.

Soorlu nunatsinni sikumik tunisassiornerit sumiiffinni marlunni ingerlanneqarput, Qeqertarsuarmilu imermik tunisassiulernissap aallartinneqarnissaa suli naatsorsuutaavoq.

Nunatsinni aluminiumik aatsitsiviliornissamik pilersaarutit nunarsuarmi aningaasarsiornikkut ajornartorsiortoqaraluartoq unitsinneqanngillat. Pilerautip piviusunngortinnejarnissaa anguniarlugu Naalakkersuisut Alcoallu isumaqatigiissutigaat misissuinerit ingerlateqqinnejassasut. Misissuinerit naatsorsuusiornerillu sukumiisut suli pisariaqartinneqarput qanorlu piginnituunermut tunngatillugu apeqqutit ittuunissaat isummerfigitinnagu taakku naammassineqarsimasariaqarput. Naatsorsuutigaarpot apeqqutit taama ittut aappaagu upernaakkut ataatsimiinnissatsinni isummerfigisinnaalersimassagigut.

Sulilu isumalluarnissamut tunngavissaqarsorinarpooq. Naatsorsuinerit ilaat ungasinngitsumi naammassineqartut takutippaat nunatsinni erngup nukinga atorlugu aatsitsivimmik ingerlatsileraluarutta nunarsuup ilaani aamarsuit imaluunniit olie atorlugu aatsitsivimmik ingerlatamik taarsiilluta, taava nunarsuup tamarmiusup CO 2-mik aniatitsinera pingasoriaammiit aqqaneq marloriaat tikillugu apparsaavigineqarsinnaagaluartoq.

### **Aatsitassarsiorneq uuliamillu ujarlernerit**

Nunatta aningaasarsiornikkut imminut nappatissinnaalerneissaanut matuersaatit ilaat tassaassaaq uuliasiornikkut isaatitaqalersinnaaneq. Nunarsuarmi aningaasarsiornikkut ajornartorsiortoqaraluartoq taamaattoq nunatta imartaani uuliasiulerumallutik ujarlersut qasukkaaminngillat. Uuliasiorniartnunt akuersissutit 2007-imiit 2008-p tungaanut tunniunnejarnikut marlunniit 13-inut amerlinikuupput, naatsorsuutigaarpullu maannakkumiit ukiut marluk qaangiutinnginnerini uuliamik ujarlerluni qillerisoqarnissaa.

Qillerisoqarneranit uuliamik nassaartoqassagaluarpat akileraarutinit akitsuutinillu isaatisilernissat aatsaat ukiut qulit 15-illu qaangiunnerini pisinnaalissapput.

Tamatuma pinnginnerani aatsitassarsiorneq aningaasanik isaatitsilluarfiusinnaavoq suliffippassuarnillu pilersitsiviusinnaalluni. Pingaaruteqaporlu maluginiassallugu Danmark-imiit ataatsimoortumik aningaasaliissutaasartut taarserneqassappata aatsitassarsiorfippassuarnit aammalumi aluminiumik aatsitsivinnit isaatitassat pisariaqartinneqqaassammata.

Aatsitassarsiormallutik qinnuteqartartut maanna tunuarsimaanngillat amerligaluttuinnarlutillu. Nunarsuarmi aningasaqarnikkut ajornartorsiorneq siorna aallartippoq maannalu aningaasarsionerup ilorraap tungaanut saakkiartorneranut takussutissaqalereeropoq. Taamaattoqarnerata kinguneranik aatsitassarsiornikkut pilersaarutit kinguartooruteqarfiusimagaluartut maanna aallartisaqqinneqarput. Pileraarutaavoq Nalunami kultisiorfiup ukiup matuma ingerlanerani ammaqqinnissaa. Marmoriliup ammaqqinneqarnissaa 2010-p naannginnerani pilersaarutaavortaaq. Tunumi aamma

Maqqagaimmi aatsitassarsiorumallutik qinnuteqartut ukiormanna akuersissuteqarfingineqarput, taamaalillunilu pilersaarutit ingerlapput.

Suli naatsorsuutigaarput aatsitassarsiornerup iluani ukiut tallimat qullu akornanni qaangiussimalerpata inuit 1500-t sulisorineqalernissaat. Siunnerfeqarluta pikkorissaqqinnernik kiisalu Sisimiuni Nunniuinermut Aatsitassarsiornermullu Ilanniarfik atorluarutsigu nunaqavissut amerlasuut sulisorineqarsinnaanerat qulakkeersinnaassavarput.

Pilersaarutit tamakku tamarmik nunatsinnut annertunerpaamik pissarsissutaanissaat anguniarlugu Namminersulernitsinniit suliassaqarfik siullerpaaq Danmark-imit nunatsinnut nuutassarput tassaavoq aatsitassanut akisussaaffik. Nuussinissamut atatillugu pilersaarusiornerit ingerlalluarput, katersuunnitsinnilu matumani aatsitassat pillugit inatsisisaq nutaaq annertoorujussuaq suliarisussaavarput.

## **CO 2-mik aniatitsinerulernissaq**

Uuliasiulerumaarsinnaanissat, aatsitassarsiulerumaarnissat, kiisalu aluminiumik aatsitsiviliorsinnaanissaq - tamakku tamarmik nunatta CO 2-mik aniatitsinerulernissaanik kinguneqartitsissapput. Tamaattoqassaaq naak avatangiisinut silaannarmullu akornusiinnginnerpaamik atortunik atuigaluaruttaluuunniit.

Silap pissusaa pillugu isumaqatigiissutissakkut qulakkeerusupparput siunissami aningaasarsiorsinnaanikkut akornuserneqannginnissarput. Nunat allat maannamut akiliuteqarnatik uuliasiortsinnaasimasut assigalugit periarfissinneqarusuppuugut. Ilumoorsinnaanngilarmi uagut pisussanngorutta akiliuteqarujussuaqqaarluta aatsaat CO 2-mik aniatitsisinnaassasugut. Taamaattoqassagaluarparmami oqimaaqatigiinnginneqarpallaarujuussuassaaq.

Imaanngilarli Kalaallit Nunaat akisussaaqataajumanngitsoq, taama paasineqassanngilaq. Avatangiisinik mingutsitsinngitsumik nukissiuutinut atuinikkut nunarput nunanut allanut sanilliullugu siuarsimaneroqaaq. Innaallagissap nunatsinni ullumikkorpiaq atukkatta 47 %-ia erngup nukingenik innaallagissiorfimminngaanneerpoq, aningaasarpassuillu erngup nukissiorfiliortiternernut atorpagut. Tamanna isumaqarpunga akisussaassuseqartumik takutitsinertut isiginiarneqartariaqartoq.

Ullorpassuunngitsut qaangiupput Danmark-imi silap pissusaa pillugu ministeri ataatsimeeqatigigakku. Ataatsimiinnermi tassani isumaqatigiippugut silap pissusaanut tunngatillugu apeqqutit Kalaallit Nunaata Danmark-illu akornanni apeqqutituinnaq isigineqassanngitsut. Tassami nunarsuaq inuufffigisarput ataasiinnaavoq taamaattumillu nunarsuarmioqatitsinnut Naalagaaffeqatigiittut maligassiuinissarputtaaq siunniukkusullugu eqqarsaatersuutigaarput. Qanoq iliorluta nunarput mingutsitsivallaarnaveersaarluta aningaasarsiornikkut ineriartortissinnaavarput – Danmark-illu tamanna suleqatigiissutigisinnaavarput. Isumatusaartumik taamaaliorstinnaagutta nunanut allanut ineriartortunut maligassiuisutut inississaagut.

Periarfissat arlaqarput, taakkulu piffissami aggersumi annertunerusumik oqaloqatigiissutigisussaavagut. Isumaqtigiissutigaarpullu nunatta Danmark-illu akornanni december-iutinnagu isumaqtigiissuteqarnissaq anguniarniarlugu.

## **Nunarsuarmioqataaneq**

Sutigut tamatigut sapinggisamik piujuartitsinermik tunngaveqartumik ineriertortitsinissarput pingaaruteqarpoq – aamma aningaasarsiorneq eqqarsaatigalugu.

Nunarsuup issittortaa ukiuni makkunani soqtigineqaraluttuinnarpoq. Silap pinngortitallu piussaata allanngoriarnerata kingunerisaanik peqquteqartumik issittumi periarfissat nutaat ammariartorput unamminartunik allanik kinguneqartitsisussanik. Qalasersuarmi sikup aakkiartupiloornerata kingunerisaanik angallannerup annertusiartornerata nassatarisaanik nunanik eqqaamiorisatsinnik qanmut suleqatiginninnissamik piumaffiginnippoq. Sillimaniarneq alaatsinaannerillu annertusisat pisariaqaleriartorput, killeqarfinnik nakkutiginninnerit annertunerusut pisariaqalissapput aammalu avatangiisit mianerineqarnissaannik angallannikkullu sillimaniarnerit annertusisat piumasaqaataalersussaapput.

Tamakku tamarmik nunanik allanik suleqateqarnerunissamik piumaffiginnippit, qanorlu periuseqarluta suleqateqarnerunissarput aaqqissutissanerippit suliassatta ilagaat.

Allanngoriarnerujussuit pisut nunatta nipaanik erseqqissumik saqqummiussuinissamik pisariaqartitsisussaapput. Tamanna angusinnaavarput tatiginartumik, naatsorsuutigineqarsinnaasumik ammasumillu pissuseqarnikkut.

Inuiattummi ingerlariaqqikkusuprugut. Namminersulernitta atorluarnissaanut uagut kiserluinnatta apeqqutaaginnalerpugut. Timitalersuinissarput tullinguuppoq isumatusaartumillu siunissamut isiginiarluta pilersaarusrusortarnissagut aalajangiisuulluinnartussaapput. Suliassarpassuagut iluamik tunngaveqarluta aallartittarniassagatsigit misissuinernik ingerlatsisariaqartassaagut sattaaserlunilusooq suleriartarnerit pinaveersimatittariaqaratsigit.

Ullumikkut nunatsinni pissutsit atuuttut ukiorpassuit ingerlaneranni oqaluttuarisaanitta pilersitarai, inuiaqatigiittulli aaqqissuussaanerput pingartumik ukiuni 30-ni kingullerni ilusinikkiartorsimavoq. Inuiattut ineriertornitsinni massakkut imaannaangitsuik nutaamik killiffeqarpugut tassami namminersulernerput annertuumik isumaqatigiissutigalutigu alloriarfigaarput, ataatsimoorlatalu sapinggisarput tamaat pitsaanerpaamik piviusunngortikkiartussavarput. Tamanna isumaqatigiissutigisinnaasavut saliutillugit suliniarnissatsinnik piumasaqaatitaqarpoq. Qujanartumillu inuiaqatigiinni malunnartumik alloriarnermek nuannaaruteqarneq, isumalluarneq allangueqataanissamullu piumassuseqarneq tamatsinnut nukissaqartitsivoq atorluagassatsinnik.

Nunatsinni inuiaqatigiittut alloriarnerput aamma avatitsinnit annertorujussuarmik maluginiarneqarpoq, nunarpullu soqtigineqarluarpoq periarfissarpassuarnik inerisaavissatsialattut aningaasaliiffisassatullu tutsuiginartutut.

Sulineq, sulineq aammalu suli sulineq aqqutissatuaraarput, upperaarali aqqutissatta siunissattalu qaamasunera, neriuuteqarluarnissamullu pissutissaqartugut.

Suliassatta qanoq tulleriaarnissaat kisitta aalajangigassaraarput ataqeqatigiillatalu paaseqatigiinnissarput anguniartarutsigu naammassisartakkavut amerlanerpajussapput.

Naalakersuisunit neriuutigaarput ukiaq manna Inatsisartut ataatsimiinneranni Nunatsinnut innuttaasunullu iluaqutaasussanik angusaqarluarumaarluta.

Qujanaq